

易

筌

荀者聖人之作易也幽贊於神明而生蓍参天兩地而倚數觀變於陰陽而立卦發揮於剛柔而生爻和順於道德而理於義窮理盡性以至於命

隋經籍志序秦後易失說卦三篇後河內女子得之今說卦止一篇而別出序卦雜卦二篇恐隋志混言之耳

自章首至易逆數也當爲一章和順於道德順

性命之理數往者順三順字相應生著倚數立卦生爻卽下文成卦成章而陰陽剛柔仁義之理畢具于其中此自无而之有前所謂太極生兩儀兩儀生四象四象生八卦順也此皆屬理義邊事性者理之源理窮則逢其源故窮理所以盡性命者性之源性盡則逢其源故盡性所以至命只是一事非真有三項此自有以之无卽前所謂洗心以退藏於密逆也昔人有云其爲本也不可以功求其爲源也不可以行得功

亡本現行盡源成噫非知道者孰識之

生著謂初立用著之法神不能言以著言之所以贊神出命故謂之幽贊神卽大衍所謂佑神也凡著必藏于廟中人卽而筮焉示受命於神也

始終中之三數皆乾之所爲也坤則隨乾之所至兩之而已乾有一畫坤兩之爲耦乾有二畫坤兩之爲二耦乾有三畫坤兩之爲三耦有乾畫則坤能兩之乾之所无坤不能生也故田地

道无成而代有終也又曰乾知太始坤作成物
又曰成象之謂乾效法之謂坤皆三天兩地之
意也倚者依之以立數也三奇爲陽畫兩其三
以爲陰畫三畫爲初卦兩其三以爲重卦此畫
數之三兩也三三以爲老陽兩三以爲老陰二
兩一三以爲少陽二三一兩以爲少陰此策數
之兩三也凡數皆自三兩而出

坤一變爲震再變爲坎爲艮乾一變爲巽再變
爲離三變爲兌凡卦皆因二氣之變而言也陽

氣不可見則畫爲剛爻以發之陰氣不可見則
畫爲柔爻以發之凡爻皆用剛柔之形以發揮
二氣之變也陰陽以氣言剛柔以形言下文分
陰分陽迭用剛柔意亦同此

昔者聖人之作易也將以順性命之理是以立天
之道曰陰與陽立地之道曰柔與剛立人之道曰
仁與義兼三才而兩之故易六畫而成卦分陰分
陽迭用柔剛故易六位而成章

前章云立卦謂八卦也此云兼三才而兩之故

易六畫而成卦謂六十四也三畫之卦象三才
六畫之卦則兩其三才也方其三畫而未重也
下一畫爲地中一畫爲人上一畫爲天重爲六
畫則天地人之道各兩而上二爻爲天道之陰
陽下二爻爲地道之柔剛中二爻爲人道之仁
義道非兩不立偏于一非道也是故立天之道
則曰陰與陽立地之道則曰柔與剛立人之道
則曰仁與義其間皆著一與字蓋天地人之道
各兩而其所謂兩者皆相與爲用不可舉一而

廢一也

天地定位山澤通氣雷風相薄水火不相射八卦相錯數往者順知來者逆是故易逆數也

孔穎達曰此就卦象明重卦之意以乾坤象天地艮兌象山澤震巽象雷風坎離象水火若使天地不交水火異處則庶類无生成之用品物无變化之理所以因而重之今八卦相錯則天地人事无不備矣故天地定位而合德山澤異體而通氣雷風各動而相薄水火不相入而相

資八卦之用變化如此八卦交錯則易之卦爻
與天地等吉凶往來之數備在其中矣易言藏
往知來則方來已往之事易皆知之然數往者
之事則順而易度將來之事則逆而難易之占
筮爲知來設故曰逆數也如曰占事知來曰遂
知來物曰以前民用皆逆之謂也安公石易牖
云數往者順蓋因下句而並舉之非謂易有數
往之順數也

說者謂伏羲圓圖以對待言文王方圖以流行

言有先天後天二圖托言出於邵子不知對待
流行皆易所具聖人反覆推明之有對待其氣
運必流行而巳有流行其象數必對待而不
移如男女相對待其氣必相摩盪不然則男女
爲成物矣此處安得有先後之分伏羲文王之
異邪潮溪陳氏嘗云如以天地定位山澤通氣
雷風相薄水火不相射兩兩相對遂別爲伏羲
卦圖則雜卦所謂乾剛坤柔比樂師憂臨觀之
義或與或求亦兩兩相對當又爲孔子卦圖乎

學者當虛心以觀理不可遽以先入之言爲斷也

王子衡云易自文王孔子以至漢唐并无以圖爲說者獨邵子云天地定位章伏羲八卦之位帝出乎震章其卦位文王所定不知孔子但隨事理以發明卦蘊如此故以歲時物理生成之序衍卦義也則曰出齊見役說戰勞成以法象對待而發明卦之義理性情也則曰天地山澤雷風水火此氣化物理之必然者何據而以爲

義與文之辨也且神妙萬物章先以雷風火澤
水坎爲次復以水火相逮雷風不相悖山澤通
氣而言以爲義又涉於文以爲文復涉于義豈
不自相矛盾乎至是則先天後天之說不通矣
况註云此章所推卦位之說多未詳者亦自不
能爲辭也

雷以動之風以散之雨以潤之日以暄之艮以止
之兌以說之乾以君之坤以藏之

潘夢旂曰上章先之以乾坤此章終之以乾坤

蓋上章先言天地之无爲後言六子之相爲用
言天地之用六子也此章先言六子之職後言
乾坤之道言六子非乾坤則无以主之藏之也
丘行可曰雷動風散乾坤初爻相易而爲震巽
也雨潤日暄乾坤中爻相易而爲坎離也止之
說之乾坤終爻相易而爲艮兌也此六子生物
之序也六子致用主於乾而動歸於坤而藏此
又父母之功也故以乾坤終之

胡炳文曰自動至暄物之出機自止至藏物之

入機出无于有氣之行也故以象言入有於无
質之具也故以卦言

問坤以藏之于醇曰震出而艮反復復而坤藏
此易理也明此則愈應而愈寂愈動而愈靜以
得所歸宿故也五行惟土爲善藏散而施之百
昌皆遂斂而入之一物无有夫物云云各歸其
根歸根曰靜靜曰復命復命曰常盖歸藏於坤
也身心有所退藏寤爲无思寂爲无夢一致同
歸混然全體卽龍蛇之蟄是已萬物得坤而藏

遇震而出囿於化機之密庸而恬不知悟人爲
萬物之靈宜有先覺幸同歸矣而乃有殊塗幸
一致矣而乃有百慮身心已得天地之純全古
人之大體而反自失之豈不惜哉夫藏用之頃
卽未生之前酬酢之頃卽旣生之後一動一靜
卽出生入死聖凡皆然但燭歸根之爲常而泛
應之爲變則有偏必反乃同造物認出應之爲
常而忘歸宿之所在則降本流末乃物于物此
其異耳

帝出乎震齊乎巽相見乎離致役乎坤說言乎兌
戰乎乾勞乎坎成言乎艮萬物出乎震震東方也
齊乎巽巽東南也齊也者言萬物之潔齊也離也
者明也萬物皆相見南方之卦也聖人南面而聽
天下嚮明而治蓋取諸此也坤也者地也萬物皆
致養焉故曰致役乎坤兌正秋也萬物之所說也
故曰說言乎兌戰乎乾乾西北之卦也言陰陽相
薄也坎者水也正北方之卦也勞卦也萬物之所
歸也故曰勞乎坎艮東北之卦也萬物之所成終而

所成始也故曰成言乎艮

此言太極既分之後播五行於四時也震巽二木主春故震在東方巽東南次之離火主夏故爲南方之卦兌乾二金主秋故兌爲正秋乾西北次之坎水主冬故爲北方之卦土主四季故坤土在夏秋之交爲西南方之卦艮土在冬春之交爲東北方之卦木金土各二者以形王也水火各一者以氣王也坤陰土故在陰地艮陽土故在陽地震陽木故正東巽陰木故近南而

接乎陰兌陰金故正西乾陽金故近北而接乎陽此其序甚明

帝字宜一讀不可連下作一句蓋八者乃帝之所爲故以帝冠之出乎震者帝以震出萬物也故曰萬物出乎震若曰帝自出則齊乎巽亦帝自齊相見乎離則帝自相見也而可乎物至秋而成无不自得故說乾當陰陽之交故曰戰坎當萬物歸根之時故曰勞如勞而不伐之勞言成功也成則止止則復生故艮成始而成終

胡炳文曰離明以德言八卦之德可推坤地坎水以象言八卦之象可推兌秋以時言八卦之時可推以互見也坤於方獨不言西南坤土之用不止西南也蓋春屬木夏屬火夏而秋火克金者也火金之交有坤土焉則火生未未生金克者又順以相生秋屬金冬屬水冬而春水生木者也水木之交有艮土焉木克土土克水生者又逆以相克土金順以相生所以爲秋之克木土逆以相克所以爲春之生生生克克變化

无窮孰主宰之曰帝是也

坤既歸藏抑又致養順冲氣而出蟄則養以平和之味順冲氣而入蟄則養以中和之氣在物則龍蛇之在蟄在人則无思无爲之境也

神也者妙萬物而爲言者也動萬物者莫疾乎雷撓萬物者莫疾乎風燥萬物者莫熯乎火說萬物者莫說乎澤潤萬物者莫潤乎水終萬物始萬物者莫盛乎艮故水火相逮雷風不相悖山澤通氣然後能變化既成萬物也

始言六子之才各有所長終言六子之情各有
所合鄭康成曰乾坤共成萬物不可得而分故
合而謂之神

乾健也坤順也震動也巽入也坎陷也離麗也艮
止也兌說也

此章先以八字斷八卦之德以定其本義其下
三節乃以物以身以家依八德之類而分主之
使占者用之以知來物也

此以八德擬八卦繫辭傳所謂神明之德也乾

純剛故健坤純陰故順震陽生乎二陰之下則剛而進故動坎陽在二陰之中則其剛爲陰所溺故陷艮陽出二陰之上雖健亦无所往矣故止巽陰成乎二陽之下則以順而伏故入離陰在二陽之中則以順而附故麗兌陰在二陽之上則以順而見故悅

動陷止皆屬健入麗說皆屬順凡物健則能動順則能入健順其體也動入其用也健遇順則陷順遇健則麗陷麗者其勢也健者始於動而

終於止順者始於入而終於說陽之動志于得
所止陰之入志於得所說

乾爲馬坤爲牛震爲龍巽爲雞坎爲豕離爲雉艮
爲狗兌爲羊

此以八物擬八卦也健者爲馬順者爲牛善動
者爲龍善伏者爲雞質躁而外汚者爲豕質野
而外明者爲雉前剛而止物者爲狗內狠而外
說者爲羊耶雅云乾陽物也馬故蹄圓坤陰物
也牛故蹄圻陽病則陰勝故馬疾則卧陰病則

陽勝故牛疾則立馬陽物也故起先前足卧先後足牛陰物也故起先後足臥先前足學者以爲坤牛取順乾馬取健蓋知其一而已

乾爲首坤爲腹震爲足巽爲股坎爲耳離爲目艮爲手兌爲口

此以身之八體擬八卦也首會諸陽屬乾腹藏衆陰屬坤足主下六經爲震手主上六經爲艮耳輪陷內爲坎目睛外見爲離足動股隨雷風相與也耳目通竅水火相逮也口與鼻通山澤

通氣也

乾天也故稱乎父坤地也故稱乎母震一索而得男故謂之長男巽一索而得女故謂之長女坎再索而得男故謂之中男離再索而得女故謂之中女艮三索而得男故謂之少男兌三索而得女故謂之少女

此以家之八位擬八卦也純陽爲父純陰爲母陰陽在初者爲長男長女在中者爲中男中女在末者爲少男少女

乾爲天爲園爲君爲父爲玉爲金爲寒爲水爲大
赤爲良馬爲老馬爲脊馬爲馭馬爲木果

上章合八卦爲一而分德物身家以四類此章
復合四類爲一而分八卦以八門所以反覆推
廣象類以資占者之決也

乾大而无外爲天運而不已爲園故以二象爲
首在國則君在家則父皆物之元也其純粹爲
玉其堅剛爲金爲寒爲水者乾尊在上高則寒
也爲大赤者赤陽色陽始于子坎中陽爲赤極

於巳純陽也故乾爲大赤加大以別坎也乾健
爲良馬老陽爲老馬純剛爲瘠馬瘠言其骨峻
非羸馬謂也色相雜曰駁詩云皇駁其馬文王
曰昔者寡人夢見良人黑色而顛乘駁馬而偏
朱蹄是駁亦馬之上色也鄭東卿曰圜者數之
本果者木之本

諸象或謂文王所取或謂孔子所自取恐皆不
然蓋伏羲始作八卦以類萬物之情則此八卦
諸象皆伏羲所定而上古傳之以爲卜筮之用

如連山歸藏之類是也迨文王演易偶於其中
取一象而繫之爻蓋就其切於此卦此爻之時
義者而言餘不能盡取亦不必盡取也孔子類
而括之以爲周易之翼正欲後人用易不可拘
文王之已言而忘伏羲之妙用耳說者乃謂求
之於經不盡合不知易果經之所能盡否耶
坤爲地爲母爲布爲釜爲吝嗇爲均爲子母牛爲
大輿爲文爲衆爲柄其于地也爲黑

坤積陰爲地作成物爲母旁有邊幅而中廣平

南北經東西緯皆布象也釜能熟物百物生而
坤熟之也各齎其靜之翕均其動之闢也對天
言之則坤爲地就坤之色言之則坤爲黑黑者
幽陰之色也何以不言黃黃者坤之離玄者乾
之坎皆中爻之色也若論其極則乾正爲赤坤
正爲黑故乾南而坤北也自萬物言之坤皆爲
母就牛言之又爲子母者爲少牝爲孕育爲隨
順兼數義也輿主於方柄主於執皆與乾圜相
反輿加大字則又取其載之廣也乾質故坤文

乾一故坤衆乾老瘠故坤牛字牘明少且肥皆相反也地之黑者其稼亦肥

釜虛而熟物者也均虛而造物者也旁注云均造瓦之鈞載土以成器物者最是

震爲雷爲龍爲玄黃爲旉爲大塗爲長子爲決躁爲蒼莨竹爲萑葦其於馬也爲善鳴爲馵足爲作足爲的頽其於稼也爲反生其究爲健爲蕃鮮

龍依虞翻干寶作駝駝色蒼也爲雷爲龍爲決躁爲善鳴爲作足爲健皆動之象也爲大塗爲

長子爲蕃鮮皆出震之象也專通作敷華帝也
蒼言其青蒼言其美震之本色也玄黃天地之
色也乾坤初交而生震故具父母之氣焉鼎足
爾雅曰後右足白驤左足白鬲震居左也作足
猶詩思馬斯作之作雙足並舉也皆言在下之
陽畫也的顙顙有旋毛而中虛如射者之的然
言其上畫之虛也舊訓爲白非巽爲白與震色
自別宋衷曰陰在上陽在下故爲反生謂臬豆
之類戴甲而生者是也一說反生者死而復生

一歲再熟之稻也蒼良萑葦二物下盤固而上
虛脆亦陽在下之象陽長不已究爲乾健蕃卽
文言草木蕃之蕃鮮卽書奏庶鮮食之鮮震三
爻俱變則爲巽故爲蕃鮮震居東得木正氣巽
居東南得木餘氣故震花變巽爲草震駝變巽
爲魚

巽爲木爲風爲長女爲繩直爲工爲白爲長爲高
爲進退爲不果爲臭其於人也爲寡髮爲廣顙爲
多白眼爲近利市三倍其究爲躁卦

木曰曲直巽入之象也木根巽入于地地氣亦巽入於木故風與氣臭皆與木同也爲繩直爲工爲長爲高爲近利市三倍皆巽者之功也繩以曲而制直工以曲直成器物之長者高者巽積而不自知市人之謀利亦巽入而人不知也爲進退不果皆巽者之性也人柔則多疑剛則多決故巽疑而震決萬物至巽而甲乃盡脫故爲潔而齊繩直其齊白其潔也爲寡髮爲廣顙爲多白眼皆上陽盛也陰血盛者髮多陽氣盛

者髮少陽體勝者額廣陰體勝者額狹眼白者
爲陽眼黑者爲陰其大較也巽三變成震爲躁
卦乾鑿度曰物有始有壯有究震得陽氣之先
巽得陰氣之先故其卦皆有究極之義吳幼清
謂喜陰卦爲陽卦陽卦爲純陽卦不欲陽卦爲
陰卦陰卦爲純陰卦理或然也

坎爲水爲溝瀆爲隱伏爲矯輳爲弓輪其於人也
爲加憂爲心病爲耳痛爲血卦爲赤其於馬也爲
美脊爲亟心爲下首爲薄蹄爲曳其於輿也爲多

胥爲通爲月爲盜其於木也爲堅多心

坎勞卦也溝瀆隱伏矯輮弓輪爲通爲盜皆事
之勞者也矯者矯曲而使之直輮者輮直而使
之曲弓與輪皆矯輮之所成也輿之多胥馬之
下首亟心薄蹄而人之加憂心病耳痛皆勞之
象也陽陷於陰中水行於地中可謂曲而勞也
月者天之水也血者人之水也盜之潛行有水
之象陽萌於地爲赤及其純也則爲乾之大赤
美當馬之中者爲脊及其純也則爲乾之良馬

輿屬坤坤陷故多眚馬屬乾乾陷故首下蹄屬震陽不在蹄故爲薄爲曳仰不爲乾之首俯不爲震之蹄而獨當脊與心故爲美脊爲亟心在內則心爲中在外則脊爲中也木屬巽天一之水常行於木之心故爲堅多心

郭子和云易曰見輿曳馬无曳也輿得時則爲通失時則爲曳故爲曳當在輿也下多眚當在心病下簡輔云以巽離例爲月當在爲水下坎中一畫卽心體故八卦惟習坎有孚惟心孚心

居中虛於坎可見然心腎皆屬坎水火未嘗離也今人以素問所載坎離爲心腎乃易坎言心亨又言心病於木亦爲堅多心而離不言心何也中孚彖柔在內而剛得中柔在內者中虛信之本也先儒云天下惟一无對惟中无對坎離无對中也乾坤无對一也中孚无對以其似離小過无對以其似坎以此推之離雖不明言心中虛之義該之矣易坎爲心離亦爲心坎中實心之體離中虛心之用所謂有主則實无主則

虛也坎爲耳離亦爲耳鼎黃耳噬嗑上爻滅耳
象傳云聰不明也聽之不明視之不聰耳目同
用也列子所謂能以耳視而目聽卽此

艮三爻厲薰心卽心病也以其互卦有坎素問
金在志爲憂水在志爲恐恐則甚於憂故爲加
憂訟之有孚窒惕中卽加憂也加憂卽心病也
艮之厲薰心以互體有坎也水藏在腎開竅於
耳而水在志爲恐恐則傷腎故爲耳痛氣陽運
動常顯血陰流行常幽血在形如水在天地間

故坎爲血卦王萬里患耳痛魏文靖勸以加青
鹽鹿茸煎雄附爲劑且言此藥非謂虛損易中
坎爲耳痛是經中已著病證矣竟餌之而愈
莊子云上而不下則使人善怒下而不上則使
人善忘不上不下中身當心則爲心病

或問坎爲心亨而此曰心病何其反也曰有孚
則心亨矣加憂則心病矣心一也顧用之何如
耳孚之亨也是盈科而進也成章而達也泰宇
定而天光發也憂之病也是所謂饑渴害心者

也爲心之茅塞者也莊所謂萬物撓心也爲心之葦萑者也又曰天之穿之日夜无降人則顧塞其實其加憂之說乎又曰室无空虚則婦姑敦饌心无天遊則六鑿相攘其心病之說乎

易坎爲水又爲溝瀆欲行水者用溝所以爲滂之備欲停水者用瀆所以爲旱之備溝之一字从冓冓之爲言搬也去水之害如搬棄也瀆之爲字从賣賣之爲言積也鍾水之利如韞櫝也矯揉水之性而爲溝瀆亦猶矯揉木之性而爲

弓輪聖人所以範圍五行曲成萬物也以上皆用修說
離爲火爲日爲電爲中女爲甲冑爲戈兵其於人也爲大腹爲乾卦爲鰲爲蟹爲羸爲蚌爲龜其於木也爲科上稿

坎血卦水之潤也離乾卦火之燠也火日電乾槁皆離之性也甲冑戈兵大腹鰲蟹羸蚌龜皆離之形也甲冑中虛鰲蟹抱黃內坤也羸蚌龜之殼能開能閉外乾也耶雅離外剛內柔而性又火燥故爲蟹螺之形銳蚌之形刻而又皆害

麗離象陰在內則中空木中空則科上槁也空
其形槁其性也橫渠先生曰科上槁附且燥也
則謂其科上而槁蓋以枝幹之間爲科上也坎
離者乾坤之精氣乾爲首故坎爲下首坤爲腹
故離爲大腹離非能大於坤也大腹下首故疾
證也

爾雅山壘謂之坎大琴謂之離萬物之象无非
易也

艮爲山爲徑路爲小石爲門闕爲果蓏爲闍寺爲

指爲狗爲鼠爲黔喙之屬其於木也爲堅多節

大而爲山微而爲小石皆堅而止者也爲徑路
爲門闕二物皆有行有止成始成終之義也一
剛在上象木果二柔在下象草蓀闡禦止于外
象剛寺給使於內象柔也爲指義與堅多節同
虎子曰狗爾雅熊虎醜其子狗漢律捕虎一購
錢三千其狗半之是也爲狗爲鼠爲黔喙之屬
皆剛在前者也黔東北之色青黑雜也乾純陽
故但爲木果艮一陽二陰故爲木之果又爲草

之蓏震爲艸草木之始艮爲果蓏草木之終也
坎陽在中故爲堅多心艮陽在外故爲堅多節
離中虛故爲科上槁皆得巽之一者也

兌爲澤爲少女爲巫爲口舌爲毀折爲附決其於
地也爲剛鹵爲妾爲羊

羊鄭司農本作陽陽養无家女行賃炊爨賤於
妾者郭璞云巴濮之人自稱阿陽卽此妾也羊
也少女也皆女之末者也爲巫與口舌同陰在
下爲股在中爲大腹在上爲口舌巫以口舌爲

官者也毀折附決與剛鹵同剛鹵之地不能生
物兌爲金爲秋皆決折之氣也鹵者水之死氣
也坎水絕於下而澤見於上則足以爲鹵而已
孔穎達曰秋物成熟稿稈之屬則毀折果蓏之
實則附決

玩辭乾爲父坤爲母震爲長子巽爲長女離爲
中女兌爲少女皆見於象而中男少男獨不然
乾爲馬坤爲牛震爲龍艮爲狗兌爲羊皆見於
象而巽雞坎豕離雉獨不然巽爲躁卦坎爲血

卦離爲乾卦而五卦皆不然震究爲徃爲蕃鮮
巽究爲躁而六卦皆不稱究蓋互見也

來知德曰卦中立象不盡拘說卦乾馬坤牛乾
首坤腹之類有自卦情立象者如乾卦本馬而
言龍以乾道變化龍乃變化之物故以龍言之
蓋以卦情立象也荀九家亦有乾爲龍又如咸
卦艮爲少男兌爲少女男女相感之情莫如年
之少者故爻象曰拇曰腓曰股曰憧憧曰晦曰
輔頰舌无徃非感者此則以男女相感之情立

象也又如豚魚知風鶴知秋雞知旦三物皆有
信故中孚取之亦以卦情立象也又如漸取鴻
者以鴻至有時羣有序于漸之義爲切且鴻又
不再偶于卦辭女歸之義相合此亦以卦情立
象也有以卦畫之形取象者如剝言宅言牀言
廬者因五陰列於兩旁一陽覆于其上如宅如
牀如廬此以卦畫之形立象也鼎與小過亦然
又有卦體大象之象凡陽在上者皆象艮巽陽
在下者皆象震兌陽在上下者皆象離陰在上

下者皆象坎如益象離故言龜大過象坎故言棟頤亦象離故亦言龜也又如中孚君子以議獄緩死亦取噬嗑火雷之意以中孚大象離而中爻則雷也故凡陽在下者動之象在中者陷之象在上者止之象凡陰在下者入之象在中者麗之象在上者說之象又有以中爻取象者如漸卦九三婦孕不育以中爻二四合坎中滿也九五三歲不孕以中爻三五合離中虛也有將錯卦立象者如履卦言虎以下卦兌錯艮也

有因綜卦立象者如井與困相綜巽爲市邑在困爲兌在井爲巽則改爲邑矣有卽陰陽而取象者如乾爲馬本象也坎與震皆得乾之一畫亦言馬坤爲牛本象也離得坤之一畫亦言牛皆其類也有相因而取象者如革卦九五言虎者以兌錯艮艮爲虎也上六卽以豹言之豹次于虎故相因而言豹也亦有无此事此理而立象者如金車玉鉉金豈可爲車玉豈可爲鉉蓋雖无此事此理而爻內有此象也聖人立象有

卦情之象有卦畫之象有大象之象有中文之
象有錯卦之象有綜卦之象有爻變之象有占
中之象正如釋卦名義有以卦德釋者有以卦
象釋者有以卦體釋者有以卦綜釋者卽此意
也善乎蔡氏曰聖人擬諸其形容而立象至纖
至悉无所不有所謂其道甚大百物不廢也其
在中古觀此以繫辭而後世之言易者乃曰得
意在忘象得象在忘言一切指爲魚兔筌蹄殆
非聖人作易前民用以教天下之意矣

序卦傳

有天地然後萬物生焉盈天地之間者唯萬物故受之以屯屯者盈也屯者物之始生也物生必蒙故之以蒙

文中子讚易至序卦曰大哉時之相生也達者可與幾矣不言乾坤而言天地天地卽乾坤也凡陽畫皆乾凡陰畫皆坤而三百八十四爻无非乾坤也諸卦言受而乾坤不言受乾坤衆卦之父母也

玩辭屯不訓盈也當屯之時剛柔始交天地絪縕雷雨動蕩見其氣之充塞也是以謂之盈屯者氣之始蒙者識之始此屯蒙所以繼乾坤其實蒙乃屯之倒體屯後必蒙不容不蒙也諸卦皆然來知德得此意自以謂契二千年之絕學窮鄉曲士高自負許井蛙之見耳蒙者蒙也物之穉也物穉不可不養也故受之以需需者飲食之道也

子瞻曰義有不盡於名者履爲禮蠱爲事臨爲

大觥爲緩之類是也蒙者蒙也比者比也剝者剝也皆義盡於名者也

玩辭需不訓飲食也人之所需飲食爲急故以需爲飲食之道也需乾下坎上陽爲穀實而水氣上烝亦有釀酒爨食之象

飲食必有訟故受之以訟

飲食者人之所大欲也所需不如所欲則必爭故訟繼需樂記云夫豢豕爲酒非以爲禍也而獄訟益繁則酒之流生禍也是故先王因爲酒

禮一獻之禮賓王百拜終日飲酒而不得醉焉
此先王所以備酒禍也

訟必有衆起故受之以師師者衆也

人之有訟必各有黨彼以黨而起者非一人此
以黨而起者亦非一人是有衆起也皆理勢自
然也

衆必有所比故受之以比比者比也比必有所畜
故受之以小畜物畜然後有禮故受之以履

兩相比者情也而義不足以畜則情勝義而不

可久故比必有所畜所以止之也物畜則萬物
盛多而禮興焉禮義生於富足聖人因而爲之
節文故受之以履

履而泰然後安故受之以泰

曲禮云人有禮則安无禮則危

泰者通也物不可以終通故受之以否

泰而驕所以致否否而畏所以復泰

物不可以終否故受之以同人

韓康伯曰否則思通人人同志故出門同人不

謀而合

與人同者物必歸焉故受之以大有

司馬君實曰否者物不相交之卦不相交則異異則爭爭則必窮故受之以同人同人者所以通之也物通則大有矣大有者大者皆爲吾有也

物皆歸我我奄而有之能有大者也舜禹之有天下是也物得所歸其聚必大能致大者也天下之歸湯武是也此接上文進必有所歸言之

也

有大者不可以盈故受之以謙

謙者居有之道

有大而能謙必豫故受之以豫豫必有隨故受之以隨

漢文帝謙冲退讓不敢自恃廣大妄意興功故百姓蒙其休息富庶安樂此謙能致豫也

鄭康成曰豫必有隨者喜樂而出人則隨從孟子曰吾君不游吾何以休吾君不豫吾何以助

此之謂也

以喜隨人者必有事故受之以蠱蠱者事也

以喜隨人者必淪胥以壞故雜卦曰豫怠又曰
隨无故也怠則不憂无故則无所修飭萬事之
壞皆起于此方其隨也自以爲无故也孰知其
乃多事之端乎聖人斷之曰必有事其辭切矣
有事而後可大故受之以臨臨者大也

玩辭臨不訓大大者以上臨下以大臨小凡稱
臨者皆大者之事故以大稱之若豐者大也則

易卷之六
豐真訓大矣是以六十四卦有二大而不相妨
焉

物大然後可觀故受之以觀

張敬夫曰天下皆山也惟泰山則可觀天下皆
水也惟東海則可觀蓋物大然後可觀況於人
乎臨反而爲觀則二陽之大者在上故可爲四
陰之觀也

可觀而後有所合故受之以噬嗑嗑者合也

在上无可觀在下者引而去矣非可觀而能有

合乎

物不可以苟合而已故受之以賁

子瞻曰直情而行之謂之苟禮以飾情謂之賁
苟則易合易合則相瀆相瀆則易離賁則難合
難合則相敬敬則久

賁者飾也致飾然後亨則盡矣故受之以剝

虛美熏心秦亂之萌浮文妨要晉衰之兆故賁
受之以剝

剝者剝也物不可以終盡剝窮上反下故受之以

復

淮南子引易云剝之不可遂盡也故受之以復
蓋物之剝落而盡窮上反下一陽自外而來復
於內此剝繼以復也

復則不妄矣故受之以无妄有无妄然後可畜故
受之以大畜物畜然後可養故受之以頤頤者養
也

呂圭叔曰萬物盛多而後養道備也需之養養
之小頤之養養之大

不養則不動故受之以大過

龔深之曰不養則不可動故上九由順然後利涉大川

物不可以終過故受之以坎坎者陷也陷必有所麗故受之以離離者麗也

右篇上

有天地然後有萬物有萬物然後有男女有男女然後有夫婦有夫婦然後有父子有父子然後有君臣有君臣然後有上下有上下然後禮義有所錯

有傷者先以壯也進極則復入於地故繼以明夷日盈則昃也

閻彥升曰以利合者迫窮禍患害相棄也以天屬者迫窮禍患害相收也明夷之傷豈得不返於家人乎

家道窮必乖故受之以睽睽者乖也乖必有難故受之以蹇蹇者難也

屯蹇卦皆有坎故皆爲難義然屯動乎險中爲患難之難蹇見險而止則是難阻而不得前耳

與屯自不同

物不可以終難故受之以解

凡人患難畢竟皆有解散之日程傳難極則必散

解者緩也緩必有所失故受之以損

程傳縱緩則必有所失失則損

損而不已必益故受之以益益而不已必決故受之以夬夬者決也

益久則盈盈則隄防必決

易云二篇之策經分上下其來已久觀序卦可見王昭素本增離者麗也麗必有所感故受之以咸是駢拇而枝贅也

夫婦之道不可以不久也故受之以恒恒者久也艮兌二少爲咸咸則交震巽二長爲恒恒則久物不可以久居其所故受之以遯遯者退也

夫婦之終爲父母父母旣老乾退西北坤退西南矣此亦不久居其所而受之以遯也父母退遯長子壯而用事故受之以大壯大壯震長男

承乾之卦也

物不可以終遯故受之以大壯物不可以終壯故受之以晉

唐應德曰明出地上晉也日出於積陰之下而升至陽之位如人之破乎障塞而極乎高明此非强有力者不能此晉之所以次大壯也

晉者進也進必有所傷故受之以明夷夷者傷也傷於外者必反其家故受之以家人

晉與漸皆進而有別進必有歸者先以艮進必

決必有所遇故受之以姤姤者遇也

陽之長也人謂君子之當然故曰復如人之復
常也陰之長也人謂小人之天幸故曰遇如人
之遭際也

物相遇而後聚故受之以萃萃者聚也

聚與畜不同畜聚而止之義聚者不必止
聚而上者謂之升故受之以升

玩辭升主騰上而言徒上不足以擬之故曰聚
而上者謂之升如雲之升烟之升覓氣之升皆

聚而上者也若象之地中生木爻之升階則但
以上爲言爾

升而不已必困故受之以困

詠蝸牛云升高不知回竟作黏壁枯升而不已
必困此可喻也

困乎上者必反下故受之以升井道不可不革故
受之以革

困井以坎水上下取義革鼎以離火上下取義
後漢書禮儀志引古禮云立秋浚井改水冬至

鑽燧改火改水卽井道之革也

革物者莫若鼎故受之以鼎主羸者莫若長子故受之以震

馮氏曰自乾坤四十有九卦而革去故五十卦而鼎取新震乃長男代父易之序也

震者動也物不可以終動止之故受之以艮艮者止也物不可以終止故受之以漸漸者進也進必有所歸故受之以歸妹

晉者明出地上進而明也徒進不足以盡之漸

者山上有木以漸而進者也漸者進之方而漸非進也凡若此類皆取其大意以明卦之序非以卦義爲盡于此也

得其所歸者必大故受之以豐豐者大也窮大者必失其居故受之以旅

介夫曰豐盛至於窮極則必失其所安旅所以次豐也唐明皇宋徽宗是也

旅而无所容故受之以巽

彖正曰旅者親寡非巽順則无所容巽順則何

往而不入

異者入也入而後說之故受之以兌兌者說也說而後散之故受之以渙

玩辭人之情相拒則怒相入則說故入而後說之程傳人之氣憂則結聚說則舒散故說有散義渙所以繼兌也

渙者離也物不可以終離故受之以節節而信之故受之以中孚有其信者必行之故受之以小過有其信如書有其善之有盖自恃其信者其行

必果而過乎中故曰小過

有過物者必濟故受之以既濟

大過則踰越常理矣故必至於陷小過則或可以濟事故有濟而无陷也大過訓動小過訓行明過皆經越之義非過失之過矣

物不可窮也故受之以未濟終焉

右篇下

晁氏曰未濟之終復始於乾坤玄以將準未濟曰陰氣濟物乎上陽信將復始乎下明此理也

雜卦傳

乾剛坤柔比樂師憂

朱子發曰三易之卦其次各異首艮者連山也
首坤者歸藏也首乾者周易也聖人猶慮後世
不知三易之變故作雜卦一篇雜揉衆卦錯綜
其義以示變之无窮

俞玉吾曰圖始乾而終坤伏羲之易也周易始
乾而終未濟文王之易也雜卦始乾而終夬孔
子之易也易貫變變則不窮夬以五陽決一陰
夬復爲乾周流不息卽六十四卦終以未濟亦

此意也

雜卦以兩兩相對爲義取序卦而雜之然自乾
坤三十卦而至咸恒以應上篇之卦自咸恒而
下三十四卦以應下篇之卦蓋有不雜者存且
上三十卦雜下經十二卦於其間下三十四卦
亦雜上經十二卦於其間此亦雜卦之義也

臨觀之義或與或求

臨以悅道悅民主上施而爲與觀以順德從君
主觀上而爲求

屯見而不失其居蒙雜而著

此二卦皆有康主濟民之用以居對見則見謂出也以著對雜則雜謂隱也屯如高光關中河內之事蒙如孔明王猛之事屯雖出而不失其處蒙雖處而不免於出二義正相反也

震起也艮止也損益盛衰之始也

起者生於動陽在下也止者生於靜陽在上也損盛之始益衰之始

大畜時也无妄災也

乾非可止而能止之者適然之時耳无妄不宜
有禍而有禍者意外之災耳此皆非常之事
萃聚而升不來也謙輕而豫怠也

象旨陽在下卦自抑而爲謙之主故輕陽在上
卦自高而爲豫之主故怠

怠一作怡與上時災來爲韻災賤西及龜策傳
十有二月日至爲期聖人徹焉身乃无災來育
釐漢書无說詩匡鼎來匡說詩解人頌

噬嗑食也賁无色也

噬嗑以有物而見食賁以无色而受采

兌見而巽伏也

卜子夏曰兌剛內而柔外見其精而說人也巽剛外而柔內隱其情而巽物也

隨无故也蠱則飭也

隨以无故而偷安蠱以有壞而修飭故聖人不畏多難而畏无難

剝爛也復反也

爛謂一陽消亡於上反謂一陽復生於下剝極

而復如碩果不食爛而墜地核中之仁復生也
晉晝也明夷誅也

陳季立云誅當作夜與晝對古韻夜元具反與
下遇音叶也然誅原音株遇反蔡邕釋誨下獲
熏胥之辜高受滅家之誅前車已覆襲軌而驚
此可證但以反對言之陳說爲長又張衡西京
賦衛尉八屯警夜巡晝植鍛懸盾用戒不虞晝
亦音遇正相叶虞是去聲讀

井通而困相遇也

剛柔相遇而剛見揜也以通與遇對則遇爲相
抵而不通之象巽之上爻主塞坎水之下流而
坎水乃出於上蓋塞而後通者也故謂之通兌
之下爻主塞坎水之上源而坎水適在下適遇
其塞所以困也自乾坤至此凡三十卦正與上
經之數相當

咸速也恒久也渙離也節止也解緩也蹇難也
渙散則離節約則止此理之常也渙節皆有坎
水風以散之則離澤以瀦之則止

動而已出乎坎險之上則時勢寬緩矣故曰解
緩也止而正在乎坎險之中則時勢急難矣故
曰蹇難也

睽外也家人內也否泰反其類也

睽六五在外爲主家人六二在內爲主

大壯則止遯則退也大有衆也同人親也

壯不恃壯而宜止遯貴見幾而遠避皆以乾言
也大有同人皆以離之中爻爲主在上則人歸
於我故謂之衆在下則我同乎人故謂之親

革去故也鼎取新也小過過也中孚信也

革以火鎔金爲去故鼎以木鑽火爲取新以離爲主小過四陰在外而過其常中孚二陰在內而守其常二義相反對皆主陰言之

豐多故親寡旅也

親寡旅也當是旅寡親也偶顛倒耳與上親新信正相叶信音伸多故對寡親則故爲故舊之故曹顏遠詩富貴他人合貧賤親戚離卽此意也

雷電俱至其黨盛山上有火其勢孤

離上而坎下也小畜寡也履不處也需不進也訟不親也

乾陽而在上坤陰而在下者陰陽之定體如人之首上而腹下也離女在上坎男在下者陰陽之精氣互藏其宅如人之心上而腎下也是故腎之精升而爲氣則離中之陰也心之精降而爲液則坎中之陽也火陰物也而附於陽故炎上水陽物也而藏于陰故就下然則日爲陰月

爲陽乎日日則陽矣而日中之精則陰之神也
月則陰矣而月中之精則陽之神也故曰離上
而坎下

柔爲君故大有則衆柔爲臣故小畜則寡
以徃爲義故不處以須爲義故不進

大過顛也姤遇也柔遇剛也漸女歸待男行也頤
養正也旣濟定也歸妹女之終也未濟男之窮也
夬決也剛決柔也君子道長小人道憂也

吳幼清曰旣濟六二主也以陰居陰得其定位

而上下五爻皆然故曰定未濟九二主也以陽
居陰失其正位而同類二陽亦皆然故曰窮
夫以五君子決一小人不曰小人道消而曰小
人道憂蓋上下交而志同如泰之時然後小人
之道不行若以五君子臨一小人徒能使之憂
而已惟其有憂則將圖之无所不至矣王伯厚
云小人道消嘉祐是也小人道憂元祐是也

易筌附論

古易分上下二篇所謂二篇之策也孔子作傳釋經亦隨經而分謂之十翼上彖傳一下象傳二上象傳三下象傳四上繫辭傳五下繫辭傳六文言傳七說卦傳八序卦傳九雜卦傳十古者經傳各爲一書自費直以傳解經而後鄭玄以彖傳連經文然猶若今乾卦次序至王弼乃自坤卦而始每卦以彖傳移綴彖辭之後又以彖曰兩字冠之後之人遂不謂之彖傳而直謂之彖夫以孔子之彖

傳爲彖則文王之彖辭當復謂之何哉魏晉而下
去古日遠訛以傳訛至今讀者弗察先儒謂西漢
時六經與傳皆別行逮東漢諸儒作注始合經傳
爲一如春秋三傳不與經連故石經公羊傳皆無
經文藝文志所載毛詩故訓傳亦與經別及馬融
爲周禮注乃云欲省學者兩讀故具載本文而就
經爲注鄭玄與馬融同時玄以易傳合經蓋倣融
例而弼又援玄例也乃若杜預分左氏傳連於經
范望散太玄測於八十一首之下皆欲便學者之

誦覽如許俊對高貴鄉公之說也唐太宗詔名儒
定九經正義孔穎達奉詔與諸儒叅議於易獨取
王弼不本正義者以爲異說於是後學惟弼是從
莫敢移動呂汲公王原叔晁以道李巽巖呂東萊
朱紫陽皆以分經合傳爲非古吳仁傑稅與權編
周易古經亦皆極論王弼之失學者不當泥所習
見而迷其本也

班固漢書云易道深矣人更三聖世歷三古以伏
義爲上古文王爲中古孔子爲下古也與周公絕

無干涉故繫辭傳累舉庖羲文王而略不及周公
亦自可見楊子雲曰宓戲繇絡天地經以八卦文
王附六爻孔子錯其象彖其辭然後發天地之藏
定萬物之基班揚去古未遠較世儒所傳當得其
實

先儒論重卦者王弼虞翻孔穎達陸震陸德明以
爲伏羲鄭康成淳于俊以爲神農孫盛以爲夏禹
司馬遷楊雄皇甫謐以爲文王今按書大禹謨云
龜筮協從則重卦其來已久周官三易其經卦皆

八其別皆六十有四亦重卦也伏羲作卦因而重之宜不待神農以後

周禮春官太卜掌三易之法一曰連山二曰歸藏三曰周易說者謂連山艮也夏易首艮歸藏坤也商易首坤夏時講學者所重在止商時講學者所重在靜二易不傳無從考其說矣然周易自乾以至未濟一卦可變爲六十四卦非一定不易者也今雜卦傳取六十四卦錯綜之始乾而終夬是又孔子之易非伏羲文王之易矣總之一以乾爲主

則周不能改乎商商不能改乎夏夏不能改乎堯
舜堯舜不能改乎伏羲者也桓譚新論云連山八
萬言歸藏四千三百言夏易詳而殷易簡連山藏
於蘭臺歸藏藏於太卜是漢猶有此書偶未見於
稊文志耳

黃潤玉云易之道扶陽而抑陰卦之位貴中而賤
極陽過乎極雖剛不吉陰得其中雖柔不凶又曰
易動而圓範方而靜八卦中虛故圓九疇中實故
方

君子居則觀其象而玩其辭動則觀其變而玩其
占學易以求無過處處皆然卜筮乃尚占一事耳
論語云不占而已矣謂不能反身以自考亦非專
言占卜之占也

劉晦伯曰筮法占卦爻之辭然其辭或有不相應
者吉凶何自而決蓋人於辭會者淺於象會者深
伏羲教人卜筮亦有卦而已隨其所遇求之卦體
卦象卦變无不應者至卦爻之辭所該有限故有
時而不應必如左傳國語所載占卦體卦象卦變

而推互體始足以濟辭之所不及而爲吉凶之前
知云爾

洪景盧曰左傳所載周易占筮大抵只一爻之變
畢萬筮仕遇屯之比初九變也成季將生遇大有
之乾六五變也晉嫁伯姬遇歸妹之睽上六變也
晉文公迎天子遇大有乃九三變而之睽叔孫莊
叔生子豹遇明夷乃初九變而之謙崔杼娶妻遇
困乃六三變而之大過南蒯作亂遇坤乃六五變
而之比趙鞅救鄭遇泰乃六五變而之需占者卽

演而爲說然崔杼入于其宮不見其妻叔孫君子
于行三日不食殆若專爲二子作也唯陳厲公生
敬仲遇觀之否周史曰坤土也巽風也乾天也風
爲天於土上山也有山之材而照之以天光於是
乎居士上自二至四有艮象艮爲山此是用中爻
取義又有相與論事不假蓍占而引卦以言者如
鄭公子曼滿欲爲卿王子伯廖曰周易有之在豐
之離晉先穀違命進師知莊子曰周易有之在師
之臨楚王忭侈子大叔曰在復之願但以爻辭合

其所行事耳至於爲羸敗姬伐齊則可等語自是
一時探賸索隱非後人可到也衛襄公生子孔成
子占之亦遇屯之比與畢萬同雖史朝與辛廖之
言則異然皆以利建侯爲主

大衍之數五十其用四十有九陸秉曰此脫文也
當云大衍之數五十有五蓋天一地二天三地四
天五地六天七地八天九地十正五十有五而用
四十有九者除六虛之位也古者卜筮先布六虛
之位然後揲著而置六爻焉如京房馬季長鄭康

成以至王弼不悟其爲脫文而妄爲之說謂所賴者五十殊無證據又曰不用而用以之通非數而數以之成此語尤誕且繫辭曰天數二十有五地數三十凡天地之數五十有五豈不顯然哉又乾坤之策自始至終無非五十五數也蓋數始於一而終於五天以藏德運化妙其所以爲數之始終而神其所以爲用之消長者故虛一與五退藏於密秘而弗用則其用四十九焉而已耳老氏所謂有之以爲利無之以爲用是當其無而有大有之

用也此聖人千載不傳之奧旨

易之六爻數用九六先儒皆以謂九老陽也六老陰也君子欲抑陰而進陽故陽用極數而陰取其
中焉耳陰陽天道也豈人之所能抑而退之又豈
人之所能強而進之哉其說皆不通蓋天地之正
數曰一曰二曰三曰四曰五而止矣此生數也至
於六則各有所配已非正數矣作易者用天地之
生數而不用成數故孔子曰參天兩地而倚數夫
參天則一三五是矣一與三與五非九而何兩地

則二四是矣二與四非六而何此九六之義也故
易簡而天下之理得矣葉石林之言如此

陰陽之氣專則生化之理滅故至陽之中必有陰
而至陰之中必有陽至其極則相生離爲火而中
畫陰也坎爲水而中畫陽也肅肅出乎赫赫發乎
此天地之至理也

易卦有變乃九六陰陽二老之交主占者臨時而
言也至於簡帙之上成卦之後豈有某卦自某卦
來之說哉宋儒解彖傳凡有不通處卽以卦變官

紛擾甚矣仙井李舜臣易傳謂舍本卦而論他卦
及某卦自某卦來者皆所不取文山進講賁卦剛
上文柔一節亦不取卦變之說其見卓矣南溪王
拱東論卦變云竊觀彖傳如剛柔下上來往字本
義類以卦變言之愚看止是一箇見在卦體併無
卦變之說也且如訟剛來得中是上體之乾剛來
得坎體之中矣隨剛來下柔是上兌四五之剛來
下震二三之柔也噬嗑以震體之二上行離體之
五故曰柔得中上行賁良體四五之柔來離之三

以文三初之剛離體三初之剛上艮之上以文四五之柔故曰柔來而文剛分剛上而文柔大畜剛上尚賢蓋上九以陽居上六五以柔尊尚之矣晉柔進上行蓋坤體之柔上行離體之五矣无妄剛自外來而爲主於內非以外乾之剛來主於內震之初者乎升柔以時升非以巽初之柔上行坤體之柔者乎晉柔進上行其以坤體之柔可知睽柔進上行其以兌三之柔上行離五之柔可見蹇之往得中言艮上之剛往而得坎之五焉渙剛來不

窮言巽上之剛來主於坎中之二焉至于鼎柔進
上行其巽下之柔而上行離五之柔也又豈待言
哉凡此皆本卦見成所具義理一展卷間瞭然在
目若卦變甚覺牽強恐非聖人作易之本旨也

抱朴子曰八卦生鷹隼之所被六甲出靈龜之所
負謂鷹隼羽文亦有八卦之象鄙意河圖洛書聖
人則之而爲易亦如是而已故易象於天地間之
萬物無所不取見於說卦者詳矣儒者於圖書獨
深求之而不已何其過也善乎歸熙甫之言聖人

見轉蓬而造車觀鳥跡而製字世之人求爲車之說與夫書之義則足矣而必孳孳焉轉蓬鳥跡之求有不笑其愚者乎然歐陽子至以爲怪妄並大傳皆有所不信則又矯之而過焉者也

易但言河出圖洛出書而已未有龜龍之說也自漢重圖讖儒者爭言奇異以希時好卽以圖屬易書屬範與易已自不合乃訛以傳訛如鄭司農馬融之流無不篤信之至劉牧又自爲易置以九爲圖十爲書托言出於希夷元人趙撝謙又爲自然

河圖謂蔡元定得於蜀山隱者雖朱子亦莫之見其爲詭秘大率皆一類耳書顧命河圖與天球並列當爲玉石之類如俞琰所言近之若龍馬自伏羲至成康歷千萬年豈有尚存之理魏青龍中張掖柳谷出石蒼質而白理有若麟鳳人馬者有若八卦列宿者其字可讀而不可曉又宋政和末於洛水得石大如拳有字兩行宇宙之間何所不有特圖書偶挂聖人之筆而穿鑿附會之說乃勞勞矣

黃東發曰易聖人所以明斯道之變易无往不在也宋程伊川始作易傳謂易有聖人之道四焉以言者尚其辭以動者尚其變以制器者尚其象以卜筮者尚其占吉凶消長之理進退存亡之道備於辭推辭者卦可以知變而象與占在其中故其爲傳專主於辭時則有若邵康節又別求易於辭之外謂今之易後天之易也而有先天之易焉用以推占事物無不可以前知自是二說並興言理學者宗伊川言數學者宗康節同名爲易而莫能

相一至晦庵作易本義啟蒙乃兼二說謂易本爲
卜筮而作謂康節先天圖得作易之原謂伊川言
理甚備於象數猶有闕學者翕然向往之揣摩圖
象日演月高以先天爲先以後天爲次而易之上
晚添祖父矣夫易誠爲卜筮而作然吉者必其合
乎理悔吝者必其違乎理因理爲訓使各知所趨
避自文王孔子已然不特伊川也若康節先天之
說則易之書本無有也雖據其援易爲證者凡二
章亦未見其確然有合也其一章援易有太極是

生兩儀兩儀生四象四象生八卦曰此先天之卦
畫於是盡改易中伏羲始作八卦之說與重爲六
十四卦之說而以六十四卦皆爲伏羲先天之卦
畫其法自一畫而二二而四四而八八而十六十
六而三十二三十二而六十四然生兩生四生八
易有之矣生十六生三十二易此章有之否邪其
一章援易言天地定位山澤通氣雷風相薄水火
不相射曰此先天之卦位也於是盡變易中離南
坎北之說與凡震東方卦兌西方卦之說而以乾

南坤北爲伏羲先天之卦位其說以離爲東以坎爲西以兌巽爲東南西南以震艮爲東北西北然天地定位安知非指天位乎上地位乎下而言南方炎爲火北方寒爲水亦未見離與坎之果屬東與西而可移離坎之位以位乾坤也易之此章果有此位置之意否邪且此二章果誰爲之謂出於孔子孔子无先天之說也謂出於伏羲伏羲未有易之書也何從而知此二章爲先天圖方畫於康節何以明其爲伏羲嘗聞先天爲演數設也康節

既沒數學无傳今所存之空圖殆不能調絃者之
琴譜晦庵雖爲之訓釋他日答王子合書亦自有
康節說伏羲八卦近於附會穿鑿之疑則學者亦
當兩酌其說而審所當務矣

天地定位者天尊而上地卑而下其位一定而不
可易取其象於卦爲乾坤譬之父母雖若无所施
爲實主乎一家而居其尊者也山澤通氣者山澤
一高一下水脉灌輸而其氣實相通通之爲言貫
也易取其象於卦爲艮兌雷風相薄者雷風一迅

一烈氣勢翕合而其形實相薄薄之爲言逼也易取其象於卦爲震巽水火不相射者水火一寒一熱宜若相息滅而下然上沸以成既濟之功乃不相射不相射者言不如射者之相射害也易取其象於卦爲坎離凡六者皆天地之氣之所爲譬如六子之相運用而悉出於父母者也聖人釋八卦之義不過如此而已歷漢唐及伊洛諸儒未有異說惟邵康節乃創爲先天之圖移卦之離南坎北爲乾南坤北曰此取易之天地定位也然易曰離

也者明也南方之卦也坎者水也正北方之卦也則離南坎北經有明文矣况風一從南卽盎然以溫風一從北卽冷然以寒南方屬夏其熱如此北方屬冬其凍如此離南坎北信乎其如今易之言矣康節移之以位乾坤何所驗以爲信邪康節旣移乾坤於南北又移艮以居西北移兌以居東南曰此取易之山澤通氣也然易曰艮東北之卦也又曰兌正秋也則艮居東北兌居正西經有明文矣若山澤通氣特言其通氣而已未嘗明言艮爲

西北兌爲東南也山必資乎澤澤必出于山豈必卦位與之相對而後氣可相通耶康節旣移東北之艮於西北遂移震於東北而移巽於西南曰取易之雷風相薄也然易曰震東方也又曰巽東南也則震居東方巽居東南經有明文矣若雷風相薄特言其相薄而已未嘗明言震爲東北巽爲西南也震惟居正東巽惟居東南逼近而合故言相薄若遠而相對安得相薄而東北爲寅時方正月又豈雷發之時邪康節旣移離坎之位以位乾坤

乃移離於正東移坎於正西曰取易之水火不相射也然南方爲離北方爲坎經文炳然若水火不相射特言其性相反而用相資耳未嘗明言離爲東方之卦坎爲西方之卦也說者謂離指火爲日遂以離爲東指水爲月遂以坎爲西按說卦先言離爲火然後言離爲日獨言坎爲水而未嘗言坎爲月蓋日乃太陽之精非特可以離言月乃太陰之精非特可以坎言月雖陰而其出必於東日雖陽而其沒必於西周流運轉晝夜不停非若水火

定位於一方者比也又可借日月以代水火爲言
邪易畫於伏羲演於文王繫於孔子傳之天下萬
世惟此一易而已未聞有先天後天之分也朱子
乃因康節之先天而反有疑於文王孔子之易又
有疑於伊川之易傳且有疑於易此章八卦之位
何其過也按晦庵答王子合書又言康節言伏羲
卦位近於穿鑿附會且當闕之則門人所錄一時
之言有未可盡信者已

歸熙甫曰易圖非伏羲之書也邵子之學也昔者

庖羲氏之王天下也仰則觀象于天俯則觀法于地觀鳥獸之文與地之宜于是始作八卦以通神明之德以類萬物之情因而重之而剛柔之上下陰陽之變態存矣大傳曰神无方易无體夫卦散於六十四而圖可方一入於圓方之形必有曲而不該者故散圖以爲卦而卦全紐卦以爲圖而卦局邵子以共筭之法衍爲皇極經世之書有分秒直事之術其自謂先天之學固以此要其旨不叛于聖人然不可以爲作易之本也曰邵子之學所

據者大傳也不曰易有太極太極生兩儀兩儀生四象四象生八卦乎此其所謂橫圖也不曰天地定位山澤通氣雷風相薄水火不相射乎此其所謂伏羲卦位也不曰帝出乎震齊乎巽相見乎離致役乎坤說言乎兌戰乎乾勞乎坎成言乎艮此其所謂文王卦位也曰此非大傳之意也邵子謂之云耳夫易之法自一而兩兩而四四而八其相生之序則然也八卦之象莫著于八物而天地也山澤也雷風也水火也是八者不求爲偶而不能

不爲偶者也帝之出入傳固已詳之矣以八卦配四時夫以爲四時則東南西北繫是焉定非文王易置之而有此位也蓋說卦廣論易之象數自三才以至八物四時百體與夫天地間之所有何所不取孰辨其爲伏羲與文王之別哉雖圖與傳无乖刺然必因傳而爲此圖不當謂傳爲圖說也且邵子謂先天之旨在卦氣傳何爲舍而曰天地定位後天之旨在入用傳何爲舍而曰帝出乎震傳言卦爻象變詳矣而未嘗一言及于圖所可指以

爲近似者又不過如此自漢以來說易者雖不多見然王輔嗣韓康伯諸人絕無有以圖爲說者蓋以圖說易自邵子始吾怪夫儒者不敢以文王之易爲伏羲之易而乃以伏羲之易爲邵子之易也

易筌附論終